

# INcwadi kaTitjhere IBhayibheli Lami Lokuthoma

## Umgomo

Ukuthuthukiswa kwelimi kwenzeka nasinqophisa khudlwana ekulandeleni nekusebenziseni imigomo efaneleko yelimi. Ukuzimisela nokukhuthala ngehlangothini labafundi kuqakathekile ukuze bafunde ukukhuluma ilimi ngendlela efaneleko. Ababelethi nabotitjhere bakhuthazwa ukubonisa ikareko kilokho abafundi abakukhulumako nofana abakutlolako, ngombana lokhu kuzobenza bathande ukwazi ilimi labo. Utitjhere kufanele atjele abafundi ngehloso yesinye nesinye isifundo.

Iimfundo ezisencwadini yomfundi zihlelwe ngendlela ekhambisana neminyaka yabo. Kusetjenziswe amagama nelimi elilula ukuze abantwana bakghone ukuzwisisa msinya. Utitjhere ukhuthazwa ukobana afunde indaba yoke njengoba injalo eBhayibhelini ukuze abantwana bathole isithombe esipheleleko ngendaba leyo.

Nakhu okufanele abafundi bakwazi ngemva kwesinye nesinye isifundo:

- Ukufunda nokuphimisa abokamisa nabongwaqa.
- Ukusebenzisa iimphumuzi nabafunda imitlolo nokwakha iinthombengqondo ngalokho abakufundako.
- Ukuphakamisa nokwehlisa iphimbo nabafundako.
- Ukusebenzisa imibonwabo nokucabanga ngokuzikileko.
- Ukucoca indaba ebekade bayifunda nofana ebebefundelwa yona.
- Ukulalela ngokuzikileko.
- Ukufunda ngokutjheja nangendlela ezikileko.
- Ukufunda ngokunemba.
- Ukwenza ngcono nokungezelela ilwazi-magama.
- Ukumadanisa isithombe nalokho esikuhlathululako.
- Ukuyelela izinto ezifanako nezingafaniko.
- Ukuzwisisa nokudlulisa imiyalo nofana ilwazi.

## Landela imihlahlandlela!

Iinthombe ezingenzasi zisiza abafundi notitjhere ukulandela imihlahlandlela namkha imiyalo yesinye nesinye isifundo.



Utitjhere uhlathulula ngesithombe begodu atjho lokho okufanele kwenziwe.



Abafundi baqala amagama.



Abafundi bayatlola.



Abafundi bafunda amagama begodu baphendule nemibuzo.



Abafundi bafuna be bathole amagama.



Abafundi basebenzisa iimpensela zabo zombala ukufaka imibala.



Isithombe nofana itshwayo leli litjengisa umsebenzi womfundi.



Abafundi babetha izandla begodu babale.



Abafundi batshwaya iimpendulo esele bazifumene.

### *Isifundo 1 – Amatjhada ahlavunye/Abohlavunye*

Incwadi le yenzelwe ukusiza abantwana abaneminyaka emihlanu ukuya kelikhomba. Ababelethi nabotitjhere kufanele basize begodu banikele abafundi isekelo abalidingako. Abafundi banikelwa ithuba lokufunda ngamatjhada nendlela aphinyiswa ngayo. Lokhu kwenzelwa ukusiza abafundi ukobana bakwazi ukufunda isiNdebele. Inengi lamagama ahlavunye asetjenziswe kilesisifundo magama atholakala eBhayibhelini. Amatjhada lawa atlolwe ngamagabhadlhela nangamaledere amancani.

#### **Titjhere/Msizi**

Ihloso yesifundwesi kufundisa abantwana amatjhada, abokamisa nabongwaqa. Fundisa abantwana amatjhada la begodu ubanikele ithuba lokuwatlola eencwadini zabo. Abafundi abathome ngokutlola amatjhada ngamaledere amancani bese balandele ngamagabhadlhela.

Hlalisa abantwana ngokuya kweminyaka yabo. Labo abancani khulu nabasathoma isikolo abatlole abokamisa laba: a, e, i, o, u. Abafundi abatlole abokamisa laba ngokubuyebuyelela baze babajayele.

### *Isifundo 2 – Amatjhada ahlavumbili/Abohlavumbili*

Nangabe abantwana bahlaliswa ngokweminyaka yabo eenkolweni nemasontweni, utitjhere akaqinisekise ukobana bayasizana, khulukhulu nabafunda amagama amatjha. Nasele baqedile ukufunda ngamatjhada ahlavunye esifundweni sokuthoma, kufanele badlulele ematjhadeni ahlavumbili nalawo ahlavuntathu. Lokhu kufanele kwenziwe ngendlela ekungiyi yokuphimisa amagama wesiNdebele. Abantwana bazokusizeka ekufundeni nekuzwisiseni indlela ekungiyi yokuphimisa amagama wesiNdebele. Khuthaza abantwana ukutlola amatjhada lawo esele bawafundile eencwadini zabo.

#### **Titjhere/Msizi**

Khuthaza abantwana ukwakha imitjho bebayitlole phasi ngamagama esele bawafundile. Lokhu kuzokusiza ukuhlola ukobana nangembala bayawazwisisa amagama lawo.

### *Isifundo 3 – Ngimi lo*

Kilesisifundo uTitjhere ukhuthaza abafundi ukugwala. Kuqakathekile ukutjela abafundi ukobana awukho umgwalo olungileko nongakalungi. Yoke imigwalo iqakathekile, yeke kufanele ithokozelwe, ibukwe. Umsebenzi lo kufanele abafundi bawenze emakhaya basizwe malunga womndeni. Kuqakathekile ukuthi abafundi babawe isizo emakhaya nabenza umsebenzi lo.

### *Isifundo 4 – Indalo kaZimu*

Abafundi bafundiswa ngalokho okwadalwa nguZimu. Batjengise iinthombe bazimadanise namagama afaneleko. Abafunde woke amagama anikelweko begodu bawatlole phasi ngamatjhada abawafundileko: Isibonelo -

nd – indoda

ny – inyanga

ng – ingilozi

### *Isifundo 5 – Umthandazo wabantwana*

Nikela abafundi ithuba lokutjho izinto abafuna ukuzithandazela nofana ukuzithokoza kuZimu.

#### **Titjhere/Msizi**

Abafundi abafune amagama anamatjhada u-S s no-Y y esifundweni. Banikele ithuba lokwakha wabo amagama abaziqabangela wona anamatjhada ahlukileko.

## *Isifundo 6 – Umkhumbi kaNowa*

### **Titjhere/Msizi**

Abafundi ababambe ikulumiswano ngomkhumbi kaNowa. Tjhida, ubanikele ithuba lokucoca ngokukhululeka. Mhlambe abanye bakhe bawubona kwamambala, abanye mhlambe bawubona kumabonwakude namkha eenthombeni.

## *Isifundo 7 – Umthwalela*

### **Titjhere/Msizi**

Abafundi abacabange bebacoce ngeenlwana zoke zemangweni nalezo ezifuyiwako, abakhe bazibona bunqopho namkha kumabonwakude nakibomagazini. Bakhuthaze ukobana bagwale nanyana ngisiphi isilwana abathanda ukusigwala.

## *Isifundo 8 – Izulu lathula*

Abafundi abacoce begodu babe nekulumo-pikiswano ngobuhle nobumbi bezulu. Babonise isithombe sezungulekosi nemibala yalo ehlukeneko. Abagwale izungulekosi. Bahlahle ekusebenziseni imibala eminengi ehlukeneko ngendlela abangakghona ngayo.

## *Isifundo 9 – Umsebenzi wokubala*

### **Titjhere**

Fundela abafundi inomboro begodu ubakhombise itjhadi elikhombisa inani leenthombe ezilingana nenomboro ozabe uyifundile. Funda ngesineke uqinisekise ukobana bakuzwa kuhle nawuphimisa iinomboro lezo. Kuqakathekile ukutjheja ukobana abafundi baphimisa igama lenomboro ngemva kwakho. Abafundi bangazitjho iinomboro zibe nesigqi ukuze bathabele isifundo.

## *Isifundo 10 – UMosi – Umntwana ngemantjini*

Abafundi abakhulume ngesithombe somntwana ongaphakathi komantji. Khuthaza abafundi ukobana benze umdlalo ngepilo kaMosi nangalokho abakubona esithombeni.

## *Isifundo 11 – UMosi ukhupha ama-Israyeli eGibhide*

Khuthaza abafundi ukobana bagwale ubuso obudanileko nobuso obuthabileko. Khumbula ukobana awukho umgwalo omuhle namkha omumbi. Vumela abafundi baveze amaziso wabo ngokukhululeka kumigwalo yabo.

Abafundi kufanele bakhuthazwe ukobana baqalisise imigwalo yomibili baveze izinto ezifanako nezingafaniko phakathi kwemigwalo yomibili. Linga ngayo yoke indlela ukobana abafundi basithabele isifundwesi. Abagwale isiyingilizi mazombe nezinto ezingafaniko.

## *Isifundo 12 – Imiyalo eliTjhumi*

### **Titjhere/Msizi**

Vumela abafundi batjho imiyalo elitjhumi sakuyicula ngesigqi, balinge ukutjengisa ukobana bayakuzwisisa lokho abakuculako. Khetha nanyana ngimuphi umyalo, uwutjho bese uyababuza bona ungowesingaki. Qinisekisa ukobana koke lokhu bakwenza ngokukuthabela.

### *Isifundo 13 – UDavida umelusi wezimvu*

Abafundi abafunde indaba kaDavida eencwadini zabo, bese bafune bebathole izimvu zakaDavida ngokulandela umuda ongena esibayeni. Kufanele ubasize bathole indlela, bangatjhayisi iboda. Abafundi bazowuthabela khulu umsebenzi lo.

### *Isifundo 14 – UDavida ulwa nendoda eyitsitsirimba*

Bafundele indaba kaDavida noGoliyadi. Abaphendule imibuzo ngemva kokulalela indaba. Banikele ithuba elaneleko lokulingisa nokuveza iinkhwepha zakaGoliyadi. Emva kwalokho abaqale amagama asesirarejweni.

Hlola ilwazi labo:

Banikele imininingwana engasilo iqiniso ngoGoliyadi:

Isithombe sakaGoliyadi amncazana, anehlonipho begodu alungile. UGoliyadi unomusa begodu uthandwa ngiwo woke umuntu. Khuthaza abafundi ukobana bakunikele imininingwana enembako ngoGoliyadi njengombana kutloliwe eBhayibhelini.

### **Isihlahlubo**

Kukhona amagama apheleleko atlolwe esirarejweni, abafundi abafune bebathole amagama lawo. Lokhu kungahle kuthathe isikhathi eside, ngalokho kufanele ube nesineke. Bathokozise ngaso soke isikhathi lokha nabathola amagama esirarejweni.

### *Isifundo 15 – UDanyela ngemgodini wamabhubezi*

Bafundele indaba kaDanyela bese ubabuza imibuzo. Kufanele baqale iinthombe ukuze bakghone ukuphendula imibuzo. Abatlole woke amagama atlolwe ngamaqatjhazi eencwadini zabo zokutlola.

### *Isifundo 16 – Ukubelethwa kwakaJesu*

Abafundi kufanele baqalisise lokho okutlolwe eenthombeni. Abagwale isiyingilizi keline nelinye igama abalithola esithombeni.

### *Isifundo 17 – Izazi zafika neziphu*

Abafundi abakhulume ngeziphu ezaphiwa uJesu zizazi, okungilezi:

Igolide

Itjhwalo

Imire

Khuthaza abafundi bonyana babuze ababelethi babo ukobana yini itjhwalo nemire.

### *Isifundo 18 – Iinthombe zokubelethwa kwakaJesu*

Hlola ilwazi lakho:

Sebenzisa itjhadi elineenthombe namagama. Abafundi abamadanise amagama neenthombe ezifaneleko. Bavumele basizane ukuze bakuthabele ukuhlolwa kwabo.

### *Isifundo 19 – UHerode ufuna ukubulala umntwana uJesu*

Sebenzisa isithombe ukusiza abafundi ukuthatha umntwana uJesu baye naye eGibhide.

### *Isifundo 20 – UJesu wenza umsebenzi kaZimu*

UJesu uthanda woke umuntu. Khuthaza abafundi bakhulume ngendlela uJesu abathanda ngayo. Abatlole umutjho othi: UJesu uyangithanda. Emva kwalokho abanikelane iincwadi zabo bese bayasizana ukuhlola imisebenzi yabo.

### *Isifundo 21 – UJesu usifundisa ukuthandaza*

Khuthaza abafundi ukukhuthalela ukuthandaza njengoDavida. Abafundi abafunde umthandazo lo bawazi ngehloko. Bafundise umthandazo weKosi othi “Baba wethu osezulwini”.

### *Isifundo 22 – UJesu uyakhamba emhlabeni*

Fundela abafundi buthaka indaba ngokufa kwakaJesu. Babuze imibuzo efana nale elandelako:

1. UJesu wafela kuphi?
2. Umzimba kaJesu usabulungwe ngethuneni nanje?
3. UJesu wavuka ngemva kwamalanga amangaki ekufeni?
4. UJesu wakhamba ngani ukuya ezulwini?

Abafundi abagwale isithombe sesiphambano.

### *Isifundo 23 – Ukucula*

Buza abafundi imibuzo ngeculo leli:

1. Iculo leli likhuluma ngobani?
2. Lisifundisani iculo leli?

#### **Titjhere/Msizi**

- Khuthaza abafundi ukobana bacule iculo leli ngesigqi sengoma ethi “Dwala lami lanini nanini”. Baculele iculo leli ukuze bezwe indlela eliculwa ngayo.
- Abakhulume ngokuqakatheka nangobuhle befundo. Qinisekisa ukobana woke umfundi uthola ithuba lokukhuluma. Khumbula ukobana ayikho ipendulo elungileko namkha engakalungi. Ihloso yalokhu kukobana boke abafundi baveze imibono yabo.